

Fikret Konjić

PREGLED REZULTATA GRAČANIČKIH SPORTSKIH KLUBOVA U TAKMIČARSKOJ SEZONI 2002./2003. GODINE

Takmičarsku sezonu 2002./2003. godina po svom "negativnom saldu" obilježili su rukometaši RK "Gračanice", koji su morali napustiti Premijer ligu Bosne i Hercegovine. S druge strane, pozitivan bilans ostvarile su odbojkašice OK "Gračanica", koje su svome gradu podarile dvije nove titule - državnih prvaka u pionirskoj i kadetskoj konkurenciji.

RUKOMET (MUŠKI)

Rukometaši "Gračanice" ušli su u sezonu bez kvalitetnih priprema, pa, iako je "igrački kadar" pojedinačno obećavao, ekipa nije uspjela sačuvati premijerligaški status. U jesenjem dijelu prvenstva, dok su u ekipi bili Čehajić, Đulić i Gojačić, sve je još nekako i štimalo i činilo se da je bodovna zaliha dovoljna za proljetni dio šampionata. Međutim, u pauzi prvenstva došlo je do problema u Klubu. Predsjednik Kluba Faruk Širbegović podnosi pa, nakon vanredne Skupštine Kluba, povlači svoju ostavku. Ekipu napuštaju Čehajić i Gojačić, a i golman Đulić odlazi u Australiju. Zimskih priprema praktično nije ni bilo.

Trener Predrag Hadžistević poveo je ekipu u odlučujuću polusezonu sa samo 5 treninga. Gubile su se utakmice i kod kuće i na strani, a stalno se govorilo da je naredni meč na svom parketu odlučujući, te ako se on dobije, pitanje opstanka u Premijer ligi biće riješeno. Bodovna prednost pred konkurentima topila se iz kola u kolo, pa je ekipa došla u situaciju da posljednje susrete igra u grču. Svi su očekivali rezultat koji bi eventualno pomogao Gračanlijama u borbi za opstanak. Pobjeda u posljednjem kolu protiv ekipe "Prijedora" pokazala se Pirovom, kada se saznalo da su Iviničani, na veliko iznenađenje, savladali "Eljezničar" u Sarajevu. Naravno, bilo je to iznenađenje samo za naivne i one koji ne poznaju stanje u BH rukometu. Oni koji prate tu našu granu sporta, uočili su da je u posljednjih 4-5 kola šampionata bilo je nekoliko, u najmanju ruku, iznenađujućih rezultata

Ipak, sve to ne opravdava domaći sastav. Krivicu, prevashodno, treba tražiti u vlastitim redovima i hitno potražiti odgovore na mnoga pitanja, a evo samo nekih: da li se trebalo na početku prvenstva odreći usluga golmana Cipurkovića, da li je bila dobra procjena da se Gojačić i Čehajić puste iz Kluba nakon što su na početku sezone dovedeni kao spasioci, zašto se nisu obavile zimske pripreme itd., itd...

Najgora stvar za gračanički rukomet bi bila kada bi se pred problemima zatvorile oči i glava gurnula u pijesak. U tom slučaju, sudbina Košarkaškog kluba "Gračanica", kojeg se malo ko više i sjeća, zadesit će

i rukometaše, a to, naravno, niko ne želi. Zato sada, kada je najteže, Klubu ne treba okrenuti leđa, treba okupiti sve one koji mogu i hoće da pomognu da se kriza prevlada, a Klub ekspresno vrati u Premijer ligu, gdje mu, po tradiciji i do sada stečenoj reputaciji, objektivno i jeste mjesto.

RUKOMET (ŽENE)

Najmlađi sportski kolektiv, koji se u ovoj takmičarskoj sezoni borio za bodove, bio je RK "INDEX". Formiran krajem 2002. godine, sa zakašnjenjem od 6 prvenstvenih kola, uključio se u takmičenje u okviru Prve rukometne lige BiH. Igraјуći po sistemu srijeda - subota, ekipa je iz kola u kolo doživljavala poraze, a s obzirom na njenu nepripremljenost, to se moglo i očekivati. U drugom dijelu šampionata, ekipa je uspjela na svom terenu dobiti jedan susret - protiv ekipe "Sloge" iz Gornjeg Vakufa - i kada se očekivalo da strpljiv rad i stečeno iskustvo počnu davati rezultate, u Klubu je došlo do nesuglasica na relaciji trener - igračice. Igračice su ultimativno zatražile smjenu trenera, a kako je predsjednik Kluba Fahir Humić stao na stranu trenera, igračice su prestale trenirati i tri kola prije kraja prvenstva ekipa je istupila iz takmičenja.

Prava je šteta što u Klubu nisu smogli snage i razriješili međusobne probleme, kako bi se bar prvenstvo privelo kraju. Trebat će vremena da se nanese šteta ugledu gračaničkog sporta zaboravi. Trener Halid Duraković ponovo je okupio četrdesetak djevojčica, uzrasta od 12 do 15 godina i ekipa trenira, a kada će biti spremna

za uključenje u ligaško takmičenje, pokazaće vrijeme koje je pred nama.

NOGOMET

Posljednji od gračaničkih sportista svoju takmičarsku sezonu zaključili su nogometaši "Bratstva". Oni su utakmicu posljednjeg kola Druge nogometne lige BiH, grupa "Sjever", igrali u Zavidovićima sa vodećom "Krivajom". S obzirom da je ekipa "Krivaje" imala prednost od dva boda, samo pobjeda mogla je gračaničkim nogometašima obezbijediti prvo mjesto i učešće u kvalifikacijama za ulazak u Prvu nogometnu ligu. Međutim, susret je protekao u prilično ravnopravnoj igri i završio se bez golova, 0:0, što je bilo dovoljno da Zavidovićani zadrže prvo mjesto na tablici.

Ipak, ne treba previše žaliti za propuštenom prilikom, jer na startu ovog prvenstva ambicije kluba su bile stvaranje mlade ekipe, koja će osvojiti solidno mjesto u gornjem dijelu tablice i pripremiti se da u narednom prvenstvu juriša na prvo mjesto. Ako se to zna, onda je cilj više nego ostvaren. Jer, ne treba zaboraviti ni činjenicu da je ekipa "Krivaje" skoro cijelo prvenstvo provela na prvom mjestu na tablici, da je u pojedinim trenucima u odnosu na Gračanlije imala i po 9 bodova prednosti, pa je i njihov plasman u kvalifikacije više nego zaslužen.

Kada se gleda sezona u cjelini, onda treba reći da je u igri Gračanlija bilo oscilacija i da su u većini slučajeva bolje igrali na gostujućim terenima nego na svom travnjaku. Dva neriješena rezultata u Gračanici, sa "Gradinom" iz Srebrenika i ekipom "Mramora",



Stadion NK "Bratstvo" Gračanica

bila su odlučujuća, jer su unepovrat otišla četiri "domaća" boda, a s njima bi "Bratstvo" bez poteškoća zauzelo prvo mjesto.

Ipak, ova sezona se može ocijeniti uspješnom, a ako se tome doda i činjenica da je nekoliko juniora iz vlastitog pogona ozbiljno zakucalo na vrata prvog sastava, te da već u prvoj postavi igra 6-7 mladih igrača, onda za ekipu "Bratstva" u narednim sezonama ne bi trebalo biti zime.

MALI NOGOMET

Malonogometaši gračaničkog kluba "Kaskada-Drvestil" u ovu takmičarsku sezonu ušli su, kao i uvijek, sa velikim ambicijama. Dvostruki prvaci Bosne i Hercegovine, osvajači KUP-a i sedmo-plasirani na evropskom šampionatu i nisu mogli drugačije. Tokom cijele sezone vodili su mrtvi trku sa ekipom "Seljaka" iz Livna i tek u pos-

ljednjem kolu u Livnu je pala odluka o ovogodišnjem BH prvaku. Nažalost, bili su to Livnjaci, mada se ne može reći da je to bilo nezasluženo.

Po svoj prilici, a to će detaljnije analize pokazati, "Kaskada" je prvo mjesto prokockala u Tuzli, u susretu sa "Bosna-Kompredom", kada su, na veliko iznenađenje, poraženi visokim rezultatom 10:1. Ovom porazu kumovale su neke nesuglasice u Klubu, koje su, nasreću po gračanički i BiH mali nogomet, brzo prevladane.

Ipak, ni drugo mjesto nije neuspjeh, jer, po nepisanom sportskom pravilu, titulu je uvijek lakše osvojiti nego odbraniti. Osim šampionata, ekipa "Kaskada-Drvestil" nije uspjela ponoviti ni uspjeh u KUP takmičenju, jer je u finalu u Vogošći poražena od mostarske "Karak" sa 7:3. U narednom šampionatu od nogometaša "Kaskade" ljubitelji sporta ponovo očekuju vrhunske rezultate.

ODBOJKA (MUŠKI)

Odbojka spada u sportove sa kraćom tradicijom u Gračanici. Ipak, za veoma kratko vrijeme, ovaj sport izborio se za svoje mjesto pod suncem i uz nogometaše "Kaskade", u narednoj sezoni, odbojkaši će jedini braniti čast gračaničkog sporta u najkvalitetnijem razredu takmičenja. Iako su bili novajlije u ligi, gračanički odbojkaši su, predvođeni trenerom Adnanom Bajraktarevićem, odlično odigrali jesenji dio prvenstva i plasirali se u gornji dio prvenstvene tablice, zabilježivši iznenađujuće sjajne pobjede gostujući u Brčkom i Kalesiji. Da su ekipa koja ima karakter, pokazali su u nekoliko mečeva, kada ni vođstvo protivnika od 2:0 u setovima nije za njih bilo nedostižno.

Drugi dio prvenstva nisu počeli slavno. I odbojkaši, kao i rukometaši, nisu obavili kvalitetne zimske pripreme, a došlo je i do nesuglasica na relaciji trener - igrači, što je uzrokovalo nekoliko poraza, pa čak i od ekipa iz Brčkog i Kalesije, koje su Gračanlije pobjeđivali u gostima.

U takvoj situaciji, igrači su ultimativno tražili smjenu trenera, do čega je, sredinom proljetnog dijela prvenstva, i došlo. Na mjesto trenera došao je profesor Muhidin Halilović, kao privremeno rješenje, jer je istovremeno vodio i žensku ekipu, a Klub je napustio i predsjednik Kluba Nihad Gazibegović. Na mjesto VD direktora kluba došao je Mahir Osmić i te promjene djelovale su kao mali pozitivni šok na ekipu, koja je u nekoliko narednih mečeva zaigrala kao preporođena i uspjela sačuvati prvoligaški status.

Kao i pred rukometnim sportskim radnicima, tako i pred odbojkašima stoji niz problema koje treba u hodu rješavati. Potrebno je odmah formirati novu upravu Kluba, obezbijediti sredstva za pripreme i takmičenje, jer će naredna sezona biti mnogo teža od prethodne. Ako još, konačno, dođe i do ujedinjena odbojke na teritoriji cijele BiH, onda će iz aktuelne Prve lige ispadati 4 kluba, pa će i borba za opstanak u ligi biti mnogo žešća.

ODBOJKA (ŽENE)

Odbojkašice "Gračanice" čine ekipu, koja je u protekloj takmičarskoj sezoni, uz nogometaše Kaskade, donijela najviše radosti ljubiteljima sporta u Gračanici. Iako daleko najmlađa, ekipa koja se takmičila u seniorskoj kategoriji, uspjela je u Drugoj odbojkaškoj ligi zauzeti treće mjesto, uz napomenu da su u oba susreta savladale drugoplasiranu ekipu "Zenice". Treba ovdje, radi objektivnijeg vrednovanja njihovih rezultata, napomenuti da su, uz samo dva izuzetka, sve igračice "Gračanice" učenice osnovne škole, a Lejla Nurikić, kapiten ekipe i Aida Ranica učenice su prvog i drugog razreda srednje škole i još nemaju napunjenih 15 godina. Upravo zbog svoje mladosti, kvaliteta i iskustva, stečenog u seniorskoj konkurenciji, one su neprikosnovene na šampionatima za mlađe kategorije u Bosni i Hercegovini.

Ove su godine po treći puta uzastopno postale državne prvakinje u pionirskoj kategoriji, ne dozvolivši svojim protivnicama na dva turnira da

im uzmu niti jedan set. Isti uspjeh postigle su i u kategoriji mlađih kadetkinja, a u juniorskoj konkurenciji osvojile su drugo mjesto, iza ekipe sarajevske "Dobrinje".

Imena Amile Gopo, Melise Helić, Melise Kamberović, Lejle Nurikić i ostalih gračaničkih odbojkašica već se sa poštovanjem izgovaraju u redovima odbojkaških BH stručnjaka. Amila Gopo je dva puta proglašavana najboljom pionirkom u BiH, istu titulu ove godine ponijela je Melisa Helić, a Melisa Kamberović je proglašena najboljim tehničarem u pionirskoj kategoriji za prošlu godinu, a ove godine tu je titulu ponijela u kategoriji mlađih kadetkinja. Najzaslužniji za uspjehe gračaničkih odbojkašica je profesor Muhidin Halilović, a bilo bi nepravedno ne spomenuti i Ibrahima Ćunića, predsjednika Kluba, koji u ova, za sport teška vremena, uspijeva obezbijediti sredstva za funkcionisanje Kluba.

KARATE

Karatisti KK "Gračanica-Nesam" tokom cijele sezone imali su niz takmičarskih uspjeha, osvojivši veliki broj pojedinačnih medalja na tur-

nirima širom Bosne i Hercegovine. Najuspješniji takmičar bila je Alisa Sarajlić, čiji su uspjesi "natjerali" selektora ženske BH selekcije da joj uputi poziv u reprezentaciju, a ona je to na najbolji način iskoristila i na pripremama reprezentacije u Trpnju (Hrvatska) uspješno položila za crni pojas "prvi dan", postavši tako prvi majstor karatea u ženskoj konkurenciji u Gračanici. Uspjeh je još veći ako se zna da Alisa Sarajlić ima samo 16 godina i da je pred njom duga i uspješna sportska karijera.

Umjesto zaključka, može se dati generalna ocjena da je ovo bila jedna od neuspješnijih sezona u poslijeratnoj istoriji gračaničkog sporta. Problemi koji prate sport u BiH nisu mimoišli ni gračaničke sportske klubove. Jedan od uzroka je i nefunkcionisanje Opštinskog sportskog saveza, koji nikako da zaživi i preuzme funkciju koja mu u organizaciji i finansiranju sporta pripada.